



Uunga siunnersuut Pilersarusiorneq aamma nunaminertat atornerqartarnerat pillugit Inatsisartut inatsisaata allanngortinnissaa pillugu Inatsisartut Inatsisaat (Piujuartitsisumik ineriartortitsinerup imarisaa pillugu aalajangersaaneq, nuna tamakkerlugu pilersaarutip imarisaa tamanullu saqqummiussineq, immikkoortunut pilersarusiornermut ataqatigiissaarineq, sumiiffinnik aalajangersaaneq, sammiviliinissamut pilersarusiorsinnaaneq, nunap immikkoortuinut pilersaarutinut pingaarnernut sinaakkutinik immikkoortunillu aalajangersakkanut eqqussineq, kiisalu suliniutissanut qinnuteqaatinut aalajangersakkanik erseqqissaaneq)

(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)
(Siullermeerneqarnera)

Demokraatit siunnersuutip uuma saqqummiunneqarneranut qujapput.

Pingaartuuvoq, Naalakkersuit eqqummaariffigijuassagaat inatsisit nutartertuarnissaat, ullutsinnut tulluunniassammata, piviusumut naleqqullutik aammalu innuttaasut pisortallu aalajangiisartuisa pisariaqartitaannut.

Inatsit soorlu unatut ittoq soqutigineqartorujussuuvoq, inatsillu pingaaruteqartorujussuulluni kommuninut, inuussutissarsiornermut innuttaasunullu. Tusarniaanermi akissuterpasuit sukumiisut tamanna takutippaat. Soorlu imaattoq, siunnersuut una pillugu pisortat iluanni suleqatigiittoqarpallaarsimanngitsoq. Kommunimi aammalu pisortaqaqfinnil allani annertuunik sukumiisunillu tusarniaanermi akissutinik atorsinnaasunik akissuteqarsimmata. Immaqa pitsaanerussagaluarpoq, pisortani siunissami naapilaartoqartartuuppat inatsimmilu taamaattumi pingaarnernut isumaqatigiissuteqarluni?

Nalunngilara, kikkut tamaasa iluarisaannik pisoqarsinnaanngitsoq, maannakkulli inatsisissatut siunnersuummik imaannaanngitsumik sammisaqalerpugut, sukumiisumik oqallisigisassamik, qulaajagassamik aammalu misissugassamik ataatsimiititaliami suliarineqarnermini.

Anguniagaq pingaarneq tassaasariaqarpoq, inatsisip imaanik isumaqatigiinneq, Namminersorlutik Oqartussat, kommunit, inuussutissariortut innuttaasullu akornanni pitsaasumik angusaqarfiulluartumillu suleqatigiinnermi tunngavissamik pilersitsisussamik.

Siunnersuut taamatut naatsunnguamik oqaaseqaaserlugu ataatsimiititaliami attuumassutilimmi suliareqqinneqartussatut innersuussutigaarput.